

‘DIA DI RINCON’ TA MATA ‘DIA DI LABOR’

‘Dia di Rincon’ mas grandi ku nunca



Selebrashon di ‘Dia di Rincon’ tabata mas grandi ku nunca e aña aki. Na tur kos por a nota esaki. Hopi bishitante di Kòrsou i Aruba. Foto ta duna un bon imágen di parti di e selebrashon.



www.cityshopbonaire.com
City Shop Bonaire
+599 700.6442
+599 717.3666

City Shop
Smart shopping • Better living

xerox™

OBERSI
ELECTRONICS
BONAIRE

2X Double Points Tuesday!
ALL DAY EVERY TUESDAY!
Earn Double Points on your Club Card
Open Monday - Saturday 8pm to 4am | Sunday 7pm to 3am | (599) 717-3504
diviflamingocasino.com | ATM available

DIVI FLAMINGO CASINO

**TA BUSKANDO
EMPLEADO**
PA REFORSA NOS
DEPARTAMENTU
DI TIRE CENTER



INFO AT EVE@NAPABONAIRE.COM

**UPB ku
sentimentu
miksto**

Polis hopi aktivo den tráfiko

KRALENDIJK – Polis ta hopi aktivo últimamente den tráfiko na Boneiru. No solamente ta parti prosèrverbal, sino detenshon tambe ta kai. Manera e echo ku djaweps 27 di aprel, alrededor di 11 or di anochi, meldkamer sentral a risibí notifikashon di un aksidente riba Kaya Dr. Jose G. Hernandez. Durante un kòntrol riba dokumentonan nesesario a resultá ku e shofùr ku a okashoná e aksidente, no tabata disponé di un reibeweis bálido. Despues di un investigashon mas aleu a resultá ku e shofùr no por a mostra un reibeweis bálido

pa motibu ku luna pasá, polis a kita su reibeweis en konekshon ku manehá bou di influensia.

A detené e hòmbler di inisial G.T.P. di 62 aña di edat pa manehá despues ku a kita su reibeweis i a okashoná aksidente. Bo ta manehá tòg miéntras bo reibeweis ta konfiská? Esaki ta un echo kastigabel i bo ta kore riesgo di haña un kastigu di prisòn òf un prolongashon di e konfiskashon di bo reibeweis.

Mesun djaweps a detené un hòmbler di inisial S.F.M. di 38 aña riba Kaminda Tra'i Montaña en konekshon ku manehá bou

di influensia. A para e sospechoso despues ku a mir'e ta kore zeilu riba kaminda.

Na momentu ku agenan a aserk'é, a sinti holó di alkohòl. E sospechoso no kier a kolaborá pa hasi un tèst di rosea.

A bai kuné warda di polis kaminda a hasi un anáalisis di rosea. En konekshon ku resultado di esaki a kita su reibeweis.

Den oranan di atardi riba djaweps 27 di aprel a para dos persona riba un skuter na Kaya Neerlandia. Ambos a haña prosèrverbal pa manehá sin hèlm bistí. Den oranan trempan di anochi un patruya a spòt shofùr di

un skuter manehando sin hèlm riba Kaya Beni.

Na momentu ku el a mira polis, el a hisa veloci-dat. Mesora a dun'é señal pa para i despues di un kòntrol mas aleu a resultá ku e no tabatin papelnan di seguro na òrdu i tampoko un plachi di number bálido. E shofùr a haña un prosèrverbal pa manehá sin hèlm bistí i pa e infrakshonnan menshoná.

Algun ratu mas lat a para shofùr di un skuter riba Kaya Internashonal pa kòntrol komo ku e i su pasahero no tabatin hèlm bistí. Durante di e kòntrol a resultá ku e shofùr no tabatin papelnan di seguro bálido. E shofùr i e pasahero a haña un prosèrverbal.

Riba djaweps 27 di aprel alrededor di 8.15 or, a detené un hòmbler en konekshon ku manehá bou di influensia. Mas aleu a resultá ku e sospechoso tabatin un prohibishon pa manehá. A konfiská su reibeweis kuater(4) luna pasá en konekshon ku manehá bou di influensia. Pa e motibu aki a konfiská outo di e sospechoso.

Ta trata aki di un hòmbler di inisial R.J.B. di 33 aña di edat. Bo ta manehá tòg mientras bo reibeweis ta konfiská?

Esaki ta un echo kastigabel i bo ta kore riesgo di haña un kastigu di prisòn òf un prolongashon di e konfiskashon di bo reibeweis.

Aksidente ku basta daño

KRALENDIJK -- Alrededor di algu pasá di 2'or di mèrdia ku sentral di polis a risibí notifikashon di un aksidente riba EEG Boulevard. Na yegada di patruya na e sitio di e aksidente a bin topa ku un SUV i un

pikòp ku a dal den otro. E motibu eksakto di e aksidente no ta konosí.

Aparentemente un di e shofùrnán aki a hala bai man kontrali. Loke probablemente ta e motibu di e aksidente aki.

No tabatin herido pero por a tuma nota di basta daño matrial na e SUV. Personal di CRS a presentá na e sitio i a atendé i registrá e aksidente.

Fuente: LIVE99FM



Personal di ambulans ta duna asistencia

KRALENDIJK – Personal di Mariadal enkargá ku operashon di ambulans mester a sali na diferente

okashon e dianan ku a pasa pa duna asistencia, sea den aksidente den tráfiko, insidente òf pa atendé hende

malu.

Djadumingu atardi por ehèmpel ambulans a keda dirigí pa misa di Coromoto, Kaya Korona, Antriol. A saka un persona ku tabata den un vehíkulo pará kant' kaminda pa hinka den e ambulans i transport'é pa hòspital.

No tabata posibel pa na e momentu ei BONERIANO haña sa kiko a pasa presis. Foto ta mostra na momentu ku a kaba pone e pashènt den ambulans. E SUV ta e outo den kua e tabata.



Baiskel den aksidente



Djasabra atardi lat tabatin un aksidente chikitu entre un outo i baiskel na kuminsamentu di Kaya Korona, pegá ku e famoso kas di Rofina, pabou di MBO. Un polis uniformá ku tabata den besindario a baha for di un outo privá pa tira bista. No tabata gran kos.

Shofùr ku malasuerte riba Kaya Korona



Ta kos ku por pasa. Shofùr di un pikòp a topa ku malasuerte riba Kaya Korona. Su vehíkulo a para. Dos persona a baha for di nan mes vehíkulo pa a pusha e pikòp kita fo'i kaminda, pa asina tráfiko por a sigui. Dos bon siudadano a pone man na obra

Tráfiko basta intrankil durante wikènt largu

KRALENDIJK -- E dianan tras di lomba tráfiko tabata basta intrankil. Afortunadamente no tabatin herido di gravetat. Sí basta daño material.

Un aksidente entre dos

vehíkulo a tuma lugá riba Kaya Nikiboko Sùit. Durante un kòntrol riba dokumentonan nesesario, a resultá ku shofùr di un di e vehíkulonon no tabatin un seguro bálido i a haña un

prosèsverbal.

Tabatin tambe un aksidente entre dos vehíkulo riba Kaminda Nieuw Amsterdam. Durante un kòntrol riba dokumentonan

nesesario, a resultá ku ámbos shofùr no tabatin un seguro bálido i a haña un prosèsverbal.

Riba kaminda di Rincon tabatin sigur dos aksidente

di tráfiko. Den un dje aksidentenan entre dos vehíkulo un dje vehíkulonon tabata kargá ku material di konstrukshon ku a resultá riba kaminda.



Palunan den Centrumgebied mester bai

KRALENDIJK -- No tin duda ku hopi di e palunan plantá ántes den Centrumgebied lo mester bai, pa motibu ku nan ta mina superfisie di e espasio pa stashoná outo i tambe e aseranan pa peaton. Ya por mira ku a zag un palu gran-

di pegá ku e kiosko di kuminda. Manera kos ta musta, mas palu lo mester bai.

Tempu ku a planta e palunan aki masomenos 40 aña pasá no a tene cuenta ku nan lo por a bira un menasa despues pa e espasio pa stashoná outo i e ase-

ranan. Entre otro a planta e temibel 'neemtree', ku su raisnan ta devastador.

Parti pabou di plenchi aki outomobilistanan ta sinti tambe kon rais di un palu na e sitio aki a penetrá bou di e asfalt i lanta esaki. Ta opvio ku lo mester bai kap e palu aki tambe.

Lástima ku den pasado no a planta masha palu emdémiko. Solamente un òf dos, entre otro un palu di kalbas a planta riba e plasa.



Tres hende riba skuter

KRALENDIJK -- Riba djáron 26 di aprel, alrededor di 10.30 or di mainta, durante un patruya rutinario a spòt dos skuter koriendo tras di otro. Riba un di e skuternan tabatin tres persona i e pasaheronan di ámbos skuter no ta-

batin un hèlm bistí. Polis a duna e shofùrnan señal pa para pa kontrolá dokumentonan nesesario. Niun di dos shofùr no por a mostra un reibeweis bálido i pa e motibu aki nan a haña un prosèsferbal. Mas aleu a konfiská ámbos skuter.

E tres pasaheronan a haña un prosèsverbal pa motibu ku nan no tabatin un hèlm bistí. Polis ta hasi un yamada na shofùrnan di skuter pa no transportá mas ku un pasahero. Esaki por ta peligroso riba kaminda públiko.

Phar Martha direktor di Kámara di Komèrsio

KRALENDIJK -- Entrante luna di yùni awor Fhar Martha ta bira direktor nobo di Kámara di Komèrsio di Boneiru. Esaki BONERIANO a komprondé di fuentenan bon informá. Te na e momentu aki Phartuchand – asina su nòmber ofisial ta – Martha ta trahando na Telbo N.V.

Fhar a yega Boneiru añanan pasá pa traha na MCB-Bank. Despues el a keda nombrá den e de-



partamentu di merkadeo di Telbo, kompania di telekomunikashon di Boneiru. Awor e ta bai pa un reto nobo, esta direktor di Kámara di Komèrsio di Boneiru.

Iregularidat den seguridat laboral

KRALENDIJK -- Riba djaluna 24 di April, alrededor di 9'or di mainta, e departamentu di Servisio pa estranhero 'Vreemdelingen Toezicht' di KPCN i Inspeksion di labor 'Arbeidsinspectie' a tene un kòntrol na un sitio di konstrukshon situá na Kaya

J.N.E. Craane.

E kòntrol a tuma lugá pa komprobá ku e kompanianan involukrá ta tene nan mes na reglanan ku ta protehá e seguridat laboral. Mas aleu a kontrolá dokumentonan nesesario.

Durante e inspeksion a konstatá algun irregulari-

dat ku tin influensia riba e seguridat laboral i a para e trabounan di konstrukshon te na momentu ku kumpli ku e reglanan.

E trabounan di konstrukshon por a kontinuá alrededor di 3'or di atardi despues ku a kumpli ku e medida- nan ku tabata eksigí.



Saludo i Dios bendishoná boso. Nos ta sigui awor despues di e fiestanan Dia di Rincon, Simadan, Parada di grandinan, Parada di Folklor i mas. Ayera tabata Obrero i dianan di fiesta a pasa.

Esta un fiesta grandi e dia di Rincon. Hende riba hende, kantidat di outo i músika tur kaminda den Rincon. Balia-mentu na òrdu, pa asina selebrá e fiesta kultural, manera nan ta bisa, mas grandi den Karibe. E aña aki mi ta kere e fiesta aki a kibra su mes rèkòrt na kantidat di hende ku tabata presente. Hende riba asera, hende meimei di kaminda. Tur hende konten-tu. Asina ta selebrá òf laga.

Esaki no a sosodé solamente dia 30 Dia di Rincon. Sigur 2 pa 3 dia di ambiente. Sigur na Boneiru no tin un aktividat ku ta hala e kantidat di hende aki. Karnaval, Regata, tur ta kai chikitu. Apesar ku tabatin diferente otro aktividat riba e dianan rondó di 30 di aprel, Rincon tabata kankan di hende. E bario simplemente tin algu ku ta atraé e hende pa bai selebrá. Anto riba dje, no solamente e hende lokal, sino tambe esnan di pafó.

Notabel na kara di e hendenan ku nan ta pasando dushi den Rincon. Tráfiko, riba Kaminda di Rincon pa yega Rincon, fila di outo. Hende ta bisa i mi mes a eksperensié, masoménos 40 minút pa yega Rincon dia 30 di aprel parti atardi.

Ta bon pa menshoná, ku tabata remarkabel, mi no a tende kehamentu tokante no tin internèt den Rincon Dia di e bario. Esaki tabata algu ku pa hopi aña tabata e kaso, Dia di Rincon no tin masha komunikashon ku yamada, tampoko Internèt riba telefon. Danki na TELBO, tin un bon desarojo pa loke ta trata e kalidat di servisio. Apesar ku e biaha aki, ku tur probabilidad, tabatin mas hende den e bario, komunikashon pa medio di selular tabata bon. Boneiru, Rincon, por mira bèk riba un super eksitoso dia di Rincon. Pabien nan nos mes. Huntu nos ta hasi hopi.

No tabatin selebrashon 'Dia di Labor'

'DIA DI RINCON' TA MATA 'DIA DI LABOR'

KRALENDIJK — No tabatin selebrashon di 'Dia di Labor' e aña aki na Boneiru. Sedenan di ABVO i AFBW, na unda sa selebrá e dia aki ku diskurso, sigui pa un enkuentro sosial, tabata ketu. Presidente di AFBW, Cherrel Kwidama, a splika BONERIANO ku enbèrdat a skohe pa no a tene selebrashon e aña aki. Motibu ta e asistensia abou di trahadónan en general na e selebrashon di último añanan.

'Dia di Labor' ta un dia di fiesta na Estádos Unídos. El a yega Boneiru via e sindikatonan di Kòrsou, Aruba i Boneiru ku tabata asosiá na IFTU – International Federation of Free Trade Unions.

Den pasado e dos federashonnan sindikal di Boneiru, AFBW i FEDEBON, tabata selebrá 'Dia di Labor' apart.

Atrabes di añanan, desde segundo mitar di dèkada setenta ku AFBW a lanta, tabatin selebrashon di 'Dia di Labor', e tempu aya mas konosí komo 'Dia di Obrero', a tuma lugá kasi tur aña.

Kwidama a splika: "Último añanan ta USIBO a organisá selebrashon di 'Dia di Labor'. Ami ta tesorero di USIBO i mester wak e finansa. Aña pasá nos a hasi hopi gastu pa organisá promé di mei, pero asistensia di miembronan tabata hopi abou. Esaki a pone nos evaluá i a disidí di no organisá selebrashon e aña aki."

Kwidama a sigui bisa ku nan a analisá i yega na e konklushon ku e motibu di tiki asistensia na 'Dia di Labor' ta debí ku e mainta ku tin kustumber di tene e selebrashon ta kai nèt en-



tre selebrashon di 'Dia di Rincon' i 'Simadan di Chana ku Doeï Diaz'. Nan ta mata e selebrashon di 'Dia di Labor'.

"E mainta despues di selebrashon di 'Dia di Rincon' hendenan ta lanta kansá. Pa kolmo atardi

tin e 'Simadan di Chana ku Doeï'. Pues esaki ta di komprondé.

Nos ta studiando un otro fórmula, kisas e wikènt despues', pa organisá 'Dia di Labor den futuro', sindikalista Cherrel Kwidama a deklará na BONERIANO.

Achi Martijn enkontrá morto den kas

KRALENDIJK -- Riba djaweps 27 di aprel alrededor di 12'or di mèrdia, 'meldkamer' sentral a risibí



notifikashon ku a enkontrá un persona ku no ta duna señal di bida den un bibienda na Kaya Shoshori na Rincon.

Mesora polis huntu ku e departamento forénsiko a bai na e bibienda. Despues di un investigashon, dòkter a konstatá morto natural. Ta trata di un hòmbèr di inisial B.A.M di 80 aña di edat nasé na Boneiru.

B.A.M. ta referí na Achi Martijn, un personahe konosí den e bario Rincon i Boneiru en general. El a traha den pasado na WEB N.V., pero despues di su penshun a biba na Hulanda.

Pero el a regresá Boneiru. Último añanan e tabata konfrontá problema di salú.

Den pasado Achi Martijn i su ruman hòmbèrnan tabata hopi embolbí den

maneho di Credit Union Lourdes di Rincon.

Nan a para na kuna di lantamentu di e koperativa di spar aki, ku lástima no ta aktivo mas.

PARTISIPASHON DI MORTO

Yunan, nietunan i ruman ta partisipá morto di

Benigno Alexio Martijn

mihó konosi komo Achi, penshonado di WEB N.V.



Dia, ora i lugá di entierro ta anunsiá despues.

Pa info i komunikado den Extra/BONERIANO

Redakshon: extrabon@gmail.com

Aviso mail: avisobon@gmail.com

Retiro James Kroon:

UPB ku sentimentu miksto

KRALENDIJK- E retiro di James Kroon komo lider polítiko di Union Patriótiko Boneriano (UPB) a trese sentimentu miksto bou di votadónan. For di dia ku e karta di retiro di Kroon a bini den publisidat a surgi basta spekulashon, diskushon i rumornan tokante e motibu pa ku e desishon aki. **BONERIANO** a tuma kontakto ku presidente di e direktiva di UPB, Luti Balentien. “Na momentu ku un

persona entregá su karta, komo direktiva bo mester asepta su deseo”, Balentien a splika.

Kroon a fungi 12 aña komo lider di partido bèrdè. Na vários okashon el a enfatisá ku e elekshon di 15 di mart lo ta su último elekshon. Básikamente despues di e periodo benidero di gobernashon el o baha ku penshon. Apesar di esaki hopi hende ta kuestioná e echo ku e ta retirá na e momentu aki. Ta un echo ku

Kroon a krese na voto personal i tambe a krese e partido. “Kon e ta stòp awor ku el a saka 1392 voto? Ta James a sòru pa e partido haña asiento. Kon por ta?”, un votadó ta kuestioná fuertemente.

Maritsa Silberie ta asumí e puesto di lider interino miéntras ta rekrutá un lider nobo. No ta mihó si Kroon lo a keda te na momentu ku haña e lider nobo? “Ta mihó asin’aki. Hopi bia un lider ta influensia e kandidato nobo pa kana den su pasonan. Asin’aki ta mihó pasombra no por influensia e lider nobo”, segun Balentien.

Jeffrey Levenstone a inisiá un enkuesta den kua por vota si un siudadano ta di opinion ku UPB mester di un lider polítiko nobo. E resultado ta mostra ku mas di 50 porshento ta haña ku bèrdat UPB mester di un lider nobo. E meta di e enkuesta aki no ta konosí, tampoko kiko lo hasi ku e resultado. **BONERIANO** a aserká Levenstone tokante esaki pero te ku publikashon di e artíkulo aki nos no a haña un reakshon.

Balentien ta agregá ku awor UPB ta bai deliñá e proseso pa yega na un lider, tambe e karakterístikanan ku e kandidato mester poseé.

Vengansa di Booi

For di den komunidad tin

rumornan persistente ku e retiro di Kroon tin di aber ku aktitut di Ramonsito Booi. Básikamente ta Booi a insistí ku UPB mester di un lider nobo. E echo ku durante e kampaña polítiko último, Booi tabata mas den publisidat ku Kroon a refsá e rumornan aki. Ta tilda Booi di un aktitut vengativo i renkoroso. Awor parse ku Kroon a sukumbí bou di preshon di Booi.

Ramonsito Booi ta desmentí esaki. “James a tuma su desishon riba su mes. El a

pone ku e no ta bai enkabesá lista na 2027. E reto nobo di diputado ta eksigí hopi tempu i ta difisil pa atendé i krea un lider nobo. Basá riba esei el a pensa mihó atendé ku diputado kaminda e ta proyektá kurason pa hende i habri kaminda pa partido atendé e lider nobo. Ramonsito Booi no a influensia ètòl den esaki”, Booi a suprayá. Tambe e ta bisa ku e ta preferá si Kroon lo a tuma retiro na òktober, momentu ku e UPB kumpli aña di eksistensia.

Consuelo Memorial

Kaya Maria C. Hellmund-Boom 11 • Bonaire • CN
T/F: (+599) 717 3243 (24h) • info@consuelomemorial.com •

Den kurason di esnan ku stima bo, sèmpèr lo bo keda kòrdá

Ku doló na nos kurason, pero konforme boluntat di Señor, nos ta partisipá fayesimentu repentino di

Shirley Eduvigis Anthony-Jansen

*17-10-1950 † 25-04-2023

Na nòmber di su kasá:

Hubert Anthony

Yunan:

Sandra Anthony

Alsi Sr. Anthony

Marlon Anthony i Miraimy Frans

Junny Anthony

Rumannan:

Sheila Jansen i famia

Norinda Jansen i famia

Edsel Jansen i famia

Rudsel Jansen i famia

Rosita Jansen i famia

Amaryllis Jansen i famia

Erwin Jansen i famia

Sharella Jansen i famia

Su nietunan:

Alison Anthony, Cassandra Martijn, Sharsy Anthony, Kelsey Domacassé, Kaylee Lammers, Alsy Jr. Anthony, Marneley Saragoza, Risheena Anthony, Jeremiah Anthony, Jahmarley Anthony, Jethro Sint Jacobo.

Su bisanietunan, tantanan, subrino i subrinanan, primu- i primanan, suá i kuñanan

Su amiganan:

Edseline Thodé, Jeanette Thodé, Rosabea Martilia,

Ellen Winklaar, Vera Nicolaas i Hermelinda Frans

Tur su bisiñanan, konosinan di kas, personal di Kas di Karko/ ZW-Groep, Dra. Lont, personal di Fundashon Mariadal, personal di Blessing Transport, departamentu di Dialyse, Partido Demokrátiko Boneriano, S.V. Tera Blanku, S.V. Rincon Vets, S.V. Hobon, S.V. Vespo.

Famia- i demas konosínan:

Jansen, Anthony, Stefania, Martijn, Matheu, Augusta, Peny, Veld, Maria, Regales, Medina, Loo, Diels, Saragoza, Domacassé, Lammers, Sint Jacobo, Thodé, Frans, Soliano, Antonie, Bernabela, Martilia i Serberie.

Si den nos tristesa nos por a lubidá kualke miembro di famia, amistad, konosí òf algún hende yegá na nos, nos ta pidi nos diskulpa pa esaki.

Akto di entierro ta tuma lugá djaweps 4 mei . Ta risibí bishita di kondolensia na Consuelo Memorial di 1’or pa 3’or, sigui pa un respòns. Despues ta hiba nos kerido defuntu na su último lugá di sosiegu na santana katólíko na Playa. Famia ta pidi pa asistí na trahe alegre. Despues di entierro NO por risibí bishita di kondolensia na kas.



ENTIDAT PÚBLIKO
BONEIRU

ANUNSIÓ

KONMEMORASHON DI ESNAN KU A MURI DESDE SEGUNDO GUERA MUNDIAL DEN AKTO DI GUERA I MISHON DI PAZ

Gobièrnu di Bonaire ta invitá pueblo di Bonaire pa asistí na e seremonia di konmemorashon di esnan ku a pèrdè nan bida desde Segundo Guerra Mundial den akto di guera i mishon di pas.

E seremonia lo tuma lugá djaweps 4 di mei 2023 na e monumento na pia di waf Chicú Mercelina. Seremonia ta kuminsá 9:00or. Pa e echo aki lo sera Kaya dilanti di waf di 07.00or pa 11.00or.

Gezaghebber Interino
R. Oleana

Sekretario
C.J. Frans



Groei met behoud van natuur en cultuur

Bo ta di opinion ku UPB mester di un lider politiko nobo

by Jeffreylevenstone@gmail.com - 1 day ago


Si 52.5% (21 votes)
No 40% (16 votes)
Mi no sa 7.5% (3 votes)

Total votes: 40

Live results

Back to poll

Share



Enkuesta trahá pa Jeffrey Levenstone

Sala di produkshon na Hato

KRALENDIJK – Den e bario di Hato dentro di poko ta bini un sala di produkshon di un kompania di konstrukshon hulandes. E empresa ta spesialisá den konstrukshon modulario i den koperashon ku Fundashon Cas Bonairiano (FCB), ta bai traha kas na Hato.

Na konstrukshon modulario ta hasi uso prinsipalmente di modulonan òf elementonan produsí. Ta konektá òf monta e modulonan akí pa asina krea un kas. Den futuro lo traha e modulonan den e sala di produkshon na Boneiru.

E base ta konsistí di frame di stal i ta akabá es-

akinan ku banda, dak òf flur. Huntu ku esaki ta tene kuenta ku e instalashon di elektrisidat i afvur di awa. Despues ku e modulonan ta kla, ta transportá nan pa e sitio di konstrukshon i montá riba e fundeshi. Asina dentro di 48 ora e kas ta será pa despues por keda akabá.

Na yùni lo inisiá ku e konstrukshon di e promé kasnan den e bario di Hato. Na promé instante ta produsí e modulonan na Hulanda i transportá nan ku barku pa Boneiru. Asina ku e sala di produkshon na Boneiru ta kla, ta bai produsí e modulonan na Boneiru.

E sala di produkshon nobo na Hato ta bai bira 3500 meter kuadrá grandi. Banda di e parti di produk-

shon, ta bai bini tambe showroom i ofisina. Ki dia ta kuminsá ku konstrukshon di e sala di produkshon, ainda no ta konosí.

Pa produkshon di e modulonan na Boneiru, na

promé instante ta usa personal for di Hulanda. Ta e intenshon pa despues guia i pone personal lokal pa produkshon di e modulonan. (Fuente/foto: Bonaire.nu)



Daño na imágen di Kas Bernabela

KRALENDIJK – Restorashon di e anterior kas di famia Bernabela na Kaya Korona na Antriol sigur no a bai manera mester tabata. A hisa e murayanan di tal forma ku un imágen mahos a keda tras. BONERIANO a komprondé ku esei ta e motibu pa kua e trabounan aktualmente ta paralisá. Ta hústamente e echo ku a dañu struktura di e kas.

E kas aki ta trahá kasi 100 aña pasá pa Marti i Cleana Martis. Nan a biba den e kas aki te na nan morto. Despues nan yunan Calita, Eddy i Bècho keda biba. Bècho tabata e último ku a muri. Un otro

ruman hòmer di nan tres a bai biba na Aruba, na unda el a bira un reshèrshi konosí.

Herederonan ku ta bibá na Aruba, despues ku e kas a para basta tempu bashí, a logra bende esaki ku un empresario chinesi, ku a laga restor'è, pero dañu su struktura i arkitektura. Resultado ta un kas di habrei desformá. BONERIANO a komprondé ku e kas aki ta denominá komo monumento. Esaki ta nifiká ku e restorashon mester sosodé na un manera korekto, kontrolá pa funshonarionan di R&O. No ta konosí na BONERIANO kon esaki por a laga esaki sosodé.

Ifna Heyliger a fayesé

KRALENDIJK – Ifna Heyliger a fayesé den fin di siman. Huntu ku su kasá Richard Wilfred Heyliger, e tabata un kara konosí den e kafetaria di Van den Tweel Supermarket. Un pareha inseparabel.

Richard tabata un sabano. El a traha hopi aña na Kòrsou, pero na momentu ku el a baha ku penshun el a skohe pa bin biba na Bo-

neiru huntu ku su kasá Ifna, desendiente boneriano.

Tantu Richard komo Ifna tabata hendenan hopi sosial den komunidat boneriano. Tur mainta por a topa ku nan na Van den Tweel ta tuma nan desayuno. Tantu personal komo klientenan di Van der Tweel tabata hopi será ku nan.


Richard Heyliger a fayesé hopi inesperá dia 20

di yùni 2021. E tempu ei Van den Tweel Supermarket a skirbi riba nan página di facebook ku Richard i Ifna tabata karanan fast di nan kafetaria 'Boka Dushi'. Despues di fayesimentu di Richard, Ifna a sigui bishitá e kafetaria di Van den Tweel na algun okashon huntu ku su famia, pero Richard tabata hasi falta na su banda.



Richard i Ifna tabata asina pegá ku Van den Tweel Supermarket ku nan a selebrá nan fiesta di 59 aniversario matrimonial na Cafe Bokadushi.





EDITORIAL

PRAKTIKÁ LOKE BO TA PREDIKÁ

BONERIANO a nota un tendensia e último añanan. Parse ku tur hende, instansia i grupo ta boga pa ta transparente. Unda ku bo mira i skucha ta enfatisá e vishon pa ta habrí ku komunidad. Un wèpsait mas bunita ku e otro ta subi onlain. Páginanan di Facebook, Instagram i Twitter ta bula sali pió ku padestul. No papia mes di tur e komunikadonan di prensa, ku ta subi diariamente riba nos mesa di redakshon. Tur ku e meta pa informá e pueblo, supuestamente transparente. Tur ta prediká esaki. Lamentablemente transparensia ta bira trubel na momentu ku e informashon ta algu negativo pa imágen di e instansia òf grupo. Na momentu ku aserká e mesun entidat aki ku preguntanan kritiko buskando e informashon korekto, kos ta kambia.

BONERIANO a konstatá ku un hues ku tabata prolongá detenshon di sospechosonan no tabata huramentá. Komo medio di komunikashon responsabel nos a tuma kontakto ku bosero di Korte di Hustisia na Kòrsou, esaki segun e prosedura. Apesar di diferente rekordatorio a dura kasi un siman i mei promé ku a reakshoná riba e topiko aki.

Ta iróniko kon kada instansia tin su opinion tokante trabou di prensa, kon un bon prensa mester aktua. Nos ta tene kuenta i respetá esaki. Na momentu ku BONERIANO risibí kítika, nos ta pone nos pasonan bou di lup, wak na unda nos a faya i si ta nesesario, trata na remediá nos eror. E mesun akstitut nos ta eksigí di tur ku ta traha pa komunidad. Tur ku mester respetá nos pueblo i trese e bèrdad. No informashon seftá, halsa loke ta pone bo den bon lus. Na nos pareser nan tin e deber ku komunidad pa ta transparente, sea ku informashon positivo komo negativo. Lógikamente nos ta komprondé ku no ta den tur kaso por amplia ku informashon entre otro na momentu ku un investigashon penal ta tumando lugá. Sí, por akklará i kaba ku spekulashon.

Dia a yega na nos konosementu ku un notario tabata bou di investigashon penal, nos a aserká Ministerio Públiko (OM). “Nos no ta desmentí ni konfirmá”, tabata reakshon di OM. Ku un simpel si òf nò, por a akklará e situashon. Ta skohe pa no hasi esei.

Meskos den e kaso tristu na momentu ku a identifiká e kabes di karpachi komo di e hòmbler Ludwig Cicilia alias Spèkè. Apesar ku a pone famia na haltura di e identifikashon, KPCN a tarda promé ku a komuniká ku komunidad. No opstante ku un otro medio di komunikashon a saka e informashon aki, KPCN no a reakshoná. Despues ku BONERIANO a sera korant, KPCN ta manda un konfirmashon. Kon nos por keda sin kuestioná e manera di traha aki? Algun luna

pasa tabatin kòntrol konhunto na Chogogo Resort. Rijksdienst Caribisch Nederland (RCN) a manda komunikado den 3 diferente idioma tokante e kontrol aki. Pero te ainda no a pone komunidad na haltura di e resultado, ni den idioma di seña.

No papia mes dia a sali den publisidat ku un polis ku tabata limpia su outo a haña un pakete ku tabata kontené un supstansia probablemente narkótiko. Mesora KPCN a uni forsa ku OM i a manda un komunikado di prensa amplio atvitiendo ku no ta tolerá lèkmentu di informashon. “Filtrashon di un investigashon ku ta andando ta preokupante i ta afektá e konfiansa den e kuerpo den su totalidat”, e komunikado a bisa. Ta un lástima ku KPCN no ta realisá ku e falta di transparensia ta afektá e konfiansa aki mas ainda.

BONERIANO komo un korant ku konstantemente ta aserká otro nan pa informashon verídiko, ta urgi lo siguiente: “Práktika loke bo ta prediká.”

Programanan di Bonaire.tv

TELBO kanal 70
Flamingo TV kanal 23

Djamar 2 mei 2023

12.00 Herensia:	D'arcy Julian Lopes
13.00 Aki Aruba:	Hazaña mega museo (Heintje Ras)
14.00 Herensia:	Ernesto Servinio (Nechi) Wijman
15.00 BAPA:	Ernesto Netto Melaan
16.00 Aktualidat:	Mariela Andrea
17.00 Dokumental:	AFBW
18.30 Herensia:	Plantashi Jato Bako, Pos di Pia i Bèl di misa di Rincon (Nechi) Wijman
20.00 Herensia:	Ruta di baluarte Rincon
21.00 Aki Bonaire:	Prome dia di Rincon
22.00 Programa:	Rincon - Rincon Di Ayera Pa Awe
23.30 Puerto Latino:	Luis Zárraga

Tur mèrdia 12'or ta kuminsá un programashon nobo di 4 ora. E programashon aki ta ripití pa 24:00.



Reflekshon di Siman

LIMPIA E 'SCREEN' DI BO KURASON

“Si nos konfesá nos pikánan, E ta fiel i hustu pa pordoná nos nos pikánan i pa limpia nos di tur inhustisia.”
1 Juan 1:9(BS)

Diferente biaha nos ta haña lèsnan balioso for di sirkunstansianan diario, lástimamente nos ta laga nan pasa nos forbe. Mi sa haña hopi di e lèsnan ei i mi tin sigur abo tambe. Limpia bentana di kas ta un trabou no gustá pa mi, pero na final tòg hopi satisfaktorio. Mi ta bisa: ‘Laga mi djis spùit e bentananan akí.’ Na momentu ku mi kaba spùit e bentananan, mi ta ripará ku e glas a keda ku mancha, mi ta kohe un paña i ku pasenshi mi ta limpia e glas. E bentananan ta keda limpi pero tòg tin algu ku ta stroba nan brio. Ta e ‘screen’ ta sushi, pasobra e ta fangu e stòf. Mi ta saka e ‘screen’ i spùit nan. Ki diferencia grandi, awor e bentananan ta limpi ku brio i bista kla.

Meskos ta ku nos bida, na momentu ku nos no konfesá nos pikánan, nos kurason ta yena ku tur sorto di impuresa. Mesora nos akstitut ta kambia i bira mas negativo. Nos no ta komprondé dikon nos ta rabia òf iritá lihé, dikon kada palabrá ku nos papia por ofendé otro.

Kisas nos ta pidi despensa, esei ta kompará ku djis spùit e bentana, pero Beibel ta siña nos pa konfesá nos pikánan i pidi pordon. Na momento nos pidi pordon, Hesus ta pordoná nos piká i purifiká nos. Hesus Su pordon so por purifiká e ‘screen’ di nos kurason i hasi nos kurason mas blanku ku sneu. Salmo 51:7 “... labami, i lo mi ta mas blanku ku sneu.”

Hesus ke purifiká bo kurason awe, pidiÉ!

Miralda Paula-Frans

Produkshon PGM

DUSHI TEMPU DI TELEVISHON

Ku e seri aki mi ke hiba boso den tempu. Mi ke rekordá huntú ku esnan ku a lanta den añanan sesenta i setenta televishon di e tempu aya. Televis-
hon “pretu ku blanku”. Tambe pa laga e generashon despues sera konosí
ku loke tabata dibertishon pa mucha, hóben i adultonan den dékadan
sesenta i setenta riba nos isla. TeleCuraçao a drenta operashon dia 31 di
yüli 1960.

Hogan's Heroes

Hogan's Heroes ta un
seri kómiko di televishon
merikano (1965-1971) ku
ta usa komo esenario un
prison Nazi Aleman pa
sera presunan di guerra
(POW – Prisoners Of
War)) durante Segundo
Guera Mundial. E seri aki
tabata un produkshon di
NBC i ta e seri merikano
di guerra di mas durashon,
inspirá pa Segundo Guera
Mundial, ku a pasa na
televishon merikano.

Protagonista den e seri ta-
bata Kolonèl Robert E. Ho-
gan, kordinando un ekipo
internashonal di presu alia-
do den e kampamentu.
Werner Klemperer ta in-
terpretá e papel di Kolonèl
Wilhelm Klink, komandante
di e prison. John Banner
a hunga e ròl di sergeant
Hans Schultz, kende ta
kometé yen di blunder,
pero di otro banda ta stimá
serka e presunan di guerra.

Stalag 13

E grupo di Hogan ta pro-
sedente di U.S. Army Air
Forces. Ta trata di e prison
fiktisio Stalag 13, situá djis
pafó di e siudat Hammel-
burg na Alemania Nazi. E
grupo sekretamente ta ta
usa e kampamentu via un
ret sekreto di túnel bou di e
kampamentu. Kolonèl Klink
i su man drechi sergeant
Schultz ta dirigí e kampa-
mentu.


E presunan ta koperá ku
gruponan di resistensia
(kolektivamente yamá 'The
Underground', konsistien-
do di desertor, spion, kon-
tra-spion, ofisialnan desleal
pa kumpli ku nan mishon.

Elenko

Produktornan di Hogan's
Heroes tabata Bernard
Fein i Albert R. Ruddy, ku
Bob Crane den e papel
prinsipal di Kolonèl Robert

Hogan.
Otro aktornan ta Wernet
Klemperer, John Banner,
Robert Clary, Richard Daw-
son, Ivan Dixon, Kenneth



Washington i Larry Hovis.
Práktikamente tur persona
ku a aktua den Hogan's
Heroes mientrastantu a
fayesé.



MONCHI & TONCHI

Tonchi, mi ta haña ku mester
duna un kurso di Papiamentu na
hendenan di SKAL.

Awèl sí. Bo no por papia di 'poesia'
ora ku bo lo kier men 'poema'



KOLOFÓN

Editor: Bonaire Communication Services N.V.
Kaya Irlanda 12,
Tel. 717-8482

Redakshon: extrabon@gmail.com

aviso: avisobon@gmail.com

Wèpsait: www.extraboneiru.com

Facebook: Extra Boneiru

Direktor
Shirley Martis
785-3824
796-3824

Partner na Aruba
Awe Mainta
Partner na Kòrsou
Extra
Partner na Boneiru
Live99

Redakshon
Papi Antoin
Nathaly
Evertsz-Ipcedencia
Velli Gijsbertha
Edson Pietersz
Ibi Piar (deporte)

Layout
Maya Beaumont

Konsehero:
Bòl Antoin
786-6818
Aviso
avisobon@gmail.com

Despedida di e promé mandatario

Gezaghebber Rijna su meta tabata pa Boneiru dal stap dilanti

KRALENDIJK -- Diputado James Kroon i a bisa ku gezaghebber Edison Rijna su meta tabata pa Boneiru dal stap pa dilanti i el a logra hopi. “Nos ta deseá Edison tur klase di éksito den su karera nobo. Tur momentu nos ta kla pa yud’é si ta nesesario. Boneiru tin hopi potensial. Danki pa e bunita trabounan i sigur Edison ta keda un persona respetá.”

Djabièrnè 28 di aprel Edison Rijna a tuma despedida públikamente di su funshon komo gezaghebber. E aktividat a tuma lugá na Parke Wilhelmina.

“Semper Edison Rijna a lucha pa Boneiru bai dilanti. E tabata un hende habrí pa tur hende papia kuné. Ta un hende ku ta tuma desishon rápido. Ami a eksperiensia i mi a siña hopi di

dje. Un hende ku atenshon pa tur hende”, sekretario di Entidat Públiko Boneiru Christopher Frans, kende a traha pegá na Rijna ultimo añanan, a trese dilanti.

Rijna mes a bisa: “Un vishon ku mi a hasi 9 aña. Bira gezaghebber di Boneiru tabata mi soño. Mi a yega na e posishon sin barba i sali ku barba. Mi wela no tabata ke pa mi traha den e edifisio ei. Ora mi a bai traha den dje mi a haña sa kiko e ta nifiká. Bo no tin dia liber i no por bira malu. Mester ta na kareda ku regularidat.” Rijna a papia tambe di su esposa, kende a fayerse durante e periodo ku e tabata gezaghebber. E tabata hopi emoshoná. “Mi a keda mi so, mi mes ta tata i mama. Mi yunan a tene pasenshi i pasa dor di e situashon. Nos huntu a karg’é. Awó mi tin



un señora i e ta sostené mi pa kontinuashon. Mi tata Eddy (†) tampoko no t’ei mas pa tende i mira ku mi ta bai for di e funshon komo gezaghebber. Danki tambe na mi rumannan pa nan sosten. Danki pa komunidat pa boso sosten di semper.”

Trupa di pushi pretu den kunuku



Reporteronan di **BONERIANO** a topa ku un trupa di mas ku 10 pushi pretu den un kunuku den área di Tra’i Montaña. Kon bini tantu pushi asina den e kunuku no tabata posibel pa averiguá. Echo sinembargo ta ku presensia di pushi den áreanan di mondi ta pone hopi preshon riba entre otro populashon di paranan endémiko, den sentido ku ta nan ta kome paranan resien nasí, pero tambe paranan adulto. E para batibati òf tapakaminda por ehèmpel ta pone webu gewon riba suela, sin ku tin niun protekshon pa e yu ku nase.

Bo tabata sa ku no por kita bo asinasina komo trahadó?

P’esei mester tin un bon motibu. Bo dunadó di trabou mester tene su mes na e prosedura di retiru.



Rijksdienst Caribisch Nederland
RCN-Unit Sociale Zaken en Werkgelegenheid



Bo kier sa mas tokante bo derechinan komo trahadó òf dunadó di trabou? Bin e ora ei na un di e seshonnan di informashon tokante asuntunan di labor di unidat di SZW di RCN.

Dunadó di trabou

2 di mei | 09.00 – 11.00 or | Kámara di Komèrsio (hulandes)
3 di mei | 19.00 – 21.00 or | Kámara di Komèrsio (papiamentu)
4 di mei | 09.00 – 11.00 or | Kámara di Komèrsio (spaño)

Trahadó

10 di mei | 19.00 – 21.00 or | den diferente idioma na diferente sitio

Inskribí

Yama 715 8849 òf manda un e-mail pa SZW.infosessie@rijksdienstCN.com.
Indiká pa kua enkuentro bo ta inskribí i kua idioma bo ta preferá.

PARADA DI FOLKOR





DIA DI RINCON DI ANTANO



Di Kuater Djadumingu di Pasku di Resurekshon,

Promé Lektura : Echonan 2, 14a, 36-41

Salmo : Salmo 23, 1-6

Di dos Lektura : 1 Pedro 2, 20b-25

Evangelio : Huan 10, 1-10

Hesukristu tabata sa di papia ku e pueblo riba su persona i di su mishon ku palabranan masha simpel mes. Di bida diario di esnan humilde Hesus a saka komparashon i alegoria ku tabata potrèt detayá di su alma i kurason. Den e evangelio di awe, Hesus ta kompará su mes ku porta di un kurá i ku e bon wardadó. Kapítulo dies di San Huan ta komponé di dos alegoria ku ta komplementá mutuamente: den promé parti di e kapítulo, ku ta esun ku ta korespondé na e djadumingu aki, Hesus ta pone komo masha importante figura di e bon wardadó komparando esaki ku esun di e ladronnan; den e di dos parti di e kapítulo e lo papia ku nos di kualidatnan di e bon wardadó.

E promé alegoria, ku nos lo por yama “e bon wardadó i e ladronnan”, tin tres parti bon definí: e promé ta un pintura di e relashon entre e trupa di karné i su wardadó, ta un pintura medio kla medio skur den kua e persona di Hesus i aktitut di e ladronnan ta yuda nos komprondé naturalesa di liderato di Kristu den Iglesia i naturalesa di tur outoridat segun espíritu di Evangelio.

Di dos parti di e alegoria ta esun den kua e evangelista ta manifestá ku e skuchadónan di Hesus no a komprondé e komparashon: skuchadónan ta e



fariseonan, e lidernan falsu di e pueblo.

E di tres parti ta enserá un argumentashon sekreto basá riba teksto di profetanen Ezekiel, Yeremías i Zakarias. E profetanen aki a papia di e Mesias komo e wardadó nobo i úniko di Israel. Hesus na ora di proklamá su mes komo wardadó ta realmente anunsiano su mesianismo.

Rumannan, ki mensahe figura di e bon wardadó tin pa nos? Ta un mensahe bálido pa siglo bintiun? E mensahe ta mashá aktual. Kisas figura di e wardadó ta un imágen di antaño i ya no ta kuadra riba pantaya di nos televishon; por ta ku e komparashon ku porta di un kurá no ta spièrta den nos loke e ta spièrta den e pueblo di Israel, pueblo di tradishon am-

bulante pa kende e bida pastoral tin sentido religioso profundo, pasobra Señor tabata guia i lider di e pueblo. Dios

na ta deshasí di mentira i papia bèrdat ku boso próhimo pasobra nos un ta miembro di otro”.

E lider a risibí e karisma di outoridat pa e bon komun di

lo “e totalidat di kondishonnan sosial ku ta faboresé e desaroyo i perfekshon integral di e persona”. Den e sentido aki di promové e bon komun nos ta komprondé e palabranan di Kristu: “Ami a bini pa duna e karnénan bida i pa nan tin bida na abundansia”.

E lider konosé e pueblo, manera e bon wardadó konosé su karnénan, un pa un. Aki e evangelio ta oponé na un ehersisio puramente burokrátiko di outoridat, friu i impersonal. Konosé e trupa ta algu mas ku un funshon intelektual; ta kombibi, tin e eksperensia, ta den komun-ion ku e pueblo. Dios ta e wardadó di Israel pasobra E konosé su pueblo, manera un esoso konosé su esposa, manera un tata konosé su yu.

Rumannan, reuní rondó di e mesa eukarístiko, rondó di Kristu, manera un trupa ta agrupá rondó di e wardadó, laga nos akseptá liderato di Hesukristu.

tabata nan wardadó i nan, e trupa di karné ku E ta guia manera e salmista ta kanta ku orguyo i amor; pero e mensahe ta aktual. Di figura di e bon wardadó nos por siña e espíritu evangéliko di e outoridat i di e liderato. E mensahe ta aktual: awe mas ku nunka, dilanti di devaluashon moral di outoridat, dilanti di apatia i deskonfiansa den lidernan, dilanti e fariseísmo di hopi gobernante di nashonnan, dilanti di distansia di lidernan religioso, divorsiá di pueblo pa un estilo impersonal di outoridat.

Mensahe di e evangelio di awe ta konserní nos tur, pasobra maske ta bèrdat ku nos komo hende ta parti nos mes den dos grupo, lider- i siguidónan, esnan ku ta manda i esnan ku ta obedesé, pasobra ta asina kondishon sosial di hende i e bon komun di e sosiedat ta eksigí. Tambe ta bèrdat ku nos tur tin un partisipashon di e outoridat di Dios, pasobra bou di shelu no tin outoridat pa poderoso ku e ta ku no tin ku obedesé, i no tin súpdito pa humilde ku e por ta ku no ta poseé algun outoridat.

E mensahe ta esaki: esun ku tin outoridat, mester obra manera Kristu, mester pasa dor di porta, ke men, tin ku goberná ku frankesa. Un gobièrnu i un liderato habrí manera un buki, sin kòmplòtnan sekreto tras di lomba di pueblo, ta manifestá rèspèt pa dignidat di e individuo i di pueblo, asina manera rèspèt pa bèrdat ku ta base di e sosiedat. San Pablo den su karta na Efesonan ta bisa: “Asi-

sosiedat. Esaki ta nifiká ku e tin ku goberná sin prewisió. Promové e bon komun tambe ta nifiká ku e lider tin di buska e bon den tur hende. Tatanan di famia, por ehèmpel, mester tin bista pa e bon material i pa e bon spiritual di e yunan; gobernantenan mester brinda e pueb-

Felis
DIA DI OBRERO
1 Mei 2023

Un kaluroso pabien na tur trahadó di Kòrsou ku ta lanta tur dia pa aportá na progreso di nos pais. Laga nos sigui ku e BON TRABOU!

Emergency
PRINTING & PUBLISHING N.V.

AGENCIA FUNERARIA
“EI SEÑORIAL”

Promé di Mei ta un gran dia pa nos tur ku ta traha, ta pesei ku sinseridat i plaser nos ta manda un kordial i kaluroso saludo na tur trahadó riba e gran dia aki.

Felis
DIA DI OBRERO
1 mei 2023

SANTA FAMILIA
BO MISA

Misa di
DIVINA
PROVIDENCIA

DJALUNA 1 DI MEI
12 OR DI MERDIA

ARUBA

Chauffeur tambe a ricibi kemadura Nissan March a kima por complete

ORANJESTAD -- Diahuebs den careda di 6'or di atardi na Mahuma un Nissan March pa un of otro motibo a pega candela, e chauffeur na prome instante a trata na paga e candela, pero a ricibi algun kemadura.

Mesora a pidi pa presencia di polis y brandweer cu hopi urgencia. Na yega-

da nan a bin topa cu e Nissan March completamente na candela, brandweer mesora a cuminsa combati e candela y tambe a mira cu e chauffeur tabata tin varios kemadura y a pidi pa presencia di ambulance pa atende cu e chauffeur.

E auto a kima por completo, kico lo por a causa e candela no ta conoci.



Accidente semi frontal cu un persona herida

ORANJESTAD -- Diahuebs den careda di 3'or y 45 di marduga a sosode un accidente semi frontal riba e caminda di Shiribana pa Tanki Leendert, un poco mas pabou di Rococo Plaza. Un dama den un Nissan March a keda herida. Mesora a pidi pa presencia di polis y ambulance na e sitio.



Hopi lihe polis a yega na e sitio y a cera e caminda pa trafico, personal di ambulance a trata e dama mesora na e sitio. E chauffeur di e Nissan March no tabata tin un rijbewijs valido y riba dje e tabata bou influencia.

Door cu nan tabata bou

influencia a trata di burla di polis bisando cu e no lo tabata tras di stuur pero polis hopi lihe tabata tin nan door y a detene e chauffeur pa motibo di tabata core bou influencia y sin un rijbewijs valido.

E chauffeur di e Nissan Micra a conta polis cu

e tabata biniendo di pabou y cu e dama tras di stuur di e Nissan March lo tabata biniendo di pariba y na su banda contrario y a dal semi frontal contra su auto, e impacto tabata hopi fuerte, pero asina mes e chauffeur di e Nissan Micra no tabata desea asistencia medico.



Candela grandi ariba tereno di Fantastic Garden

ORANJESTAD -- Den fin di siman Brandweer ta wordo notifica di un candela grandi; ariba tereno di Fantastic Garden. Na yegada di bomberonan, mesora nan ta nota cu nan lo bay tin mester di mas unidad, mirando e magnitud di e

candela.

Locual a pega candela tawata un cero grandi di ramanan di coco. Polis tambe a wordo avisa despues, cu a haya e tarea di cera ambos banda di e caminda pa evita auto pasa y causa daño tambe na e slangnan di

brandweer cu tawata ariba caminda.

Bomberonan despues di algun rato a domina e

candela. Tin algo cu no ta cuadra cu a para bira casi tur dia tin un of otro candela.

Brandweer tin man yen cu e candelanan aki, cu ta muestra debi direccion cu nan ta intencional.



ARUBA

Pelea entre rumannan morocho a caba cu hincamento

ORANJESTAD -- Riba dia di Rey, den careda di 7'or y mey di mainta na un cas na Sero Blanco, dos rumannan a cuminsa bringa den cas cu otro. Recientemente

e tata di e morochonan aki a fayece y e mama mes su salud no ta mucho bon. Ta trata di dos rumannan homber cu ta morocho.

E bringamento a bay

completamente for di man na momento cu un a hinca otro cu un obheto skerpi. E mama tur desespera a bati alarma y bou grito a pidi ayudo mirando cu un yiu a hinca su pia di morocho, hopi lihe polis a yega na e cas.

Na yegada enberdad polis a bin topa cu un rumannan herida, mesora a detene esun cu a hinca y a pidi ambulance pa e rumannan herida. Ambulance a presenta, a trata e victima na e sitio y despues a transporte pa hospital, e otro rumannan a wordo deteni y cu transportwagen e la wordo hiba warda di polis.

Mientras cu polis tabata na e sitio atendiendo cu e rumannan, a yega un otro familiar y e situacion

a bolbe escala, polisnan na e sitio mesora a pidi'e pa e bay for di e sitio te ora e situacion calma.



HULANDA

Transavia na último momentu ta anulá buelo pa i for di Schiphol

SCHIPHOL -- E kompania di aviashon, Transavia, desde e siman ku ta bini ta anulá tambe buelo pa i for di Schiphol, esaki debí na falta di personal. Esaki un boso a konfirmá serka NH Nieuws.

Pa kuantu buelo ta trata, ainda no ta konosí. Ainda no a pone tur pasahero di e buelonan anulá na altura. Segun Transavia djabièrnek ta avisá tur pasahero.

Segun e skema di Schiphol, en todo kaso a anulá e buelonan di djabièrnek mainta pa Nice, Fransiá i Bari, Italia.

E último dianan ya e anulá diferente buelo pa i for di Eindhoven Airport. Na inisio di e luna akí, tambe Transavia ya a anulá diferente buelo planiá, dor di kua mas òf ménos ocho mil hende no por a gosa di nan

fakansi.

Un boso di Transavia ta yama e anulamentu di buelonan di fakansi sin balor: "Tin menshon di un kantidat di trabou, hopi mas ku nunca anterior nos a mira." Pasaheronan di kua

anulá nan buelo na último momentu, no tin derecho riba un kompensashon finansiero. Nan por akudí na un kompania di reklamo.

"E último simannan ya mas di 1200 hende a mèldu serka nos ku tin un pro-

blema ku buelo di Transavia. Esaki ta hopi," segun analista di data di buelo, Paul Vaneker di EUclaim. Den tur kaso ta trata di buelo ku a anulá un òf dos dia promé ku salida.

Segun Vaneker, hopi

pasahero di rabiá debí na e anulamentu. Nos ta ripará ku hendenan no por alkansá e servisio di kliente.

Segun ANP, ya sigur dos mil pasahero a entregá un reklamo debí na nan buelo ku Transavia anulá.



HULANDA

Akohida di mucha grátis suspendé pa dos aña

DEN HAAG — E plan di Gabinete pa hasi akohida di mucha kasimente grátis, ta keda suspendé pa dos aña i ta drenta na vigor te na 2027 numa. E sektor no a logra pa haña sufisiente personal pa sí e demanda pa akohida di mucha aworó sigui krese mas aleu. Esaki probablemente por kondusí e gabinete pa un preis mas

haltu pa e akohida.

Un implementashon ku idadoso di un sistema nobo ta krusial pa tantu mayor, e sektor, komo e ehekutadónan, Minister Karien van Gennip di asuntunan sosial, ta bisa. Esaki, segun e minister, ta un lès tambe for di e kestion di kompensashon.

Den e akuerdo di koali-

shon a palabrá ku e kambionan den akohida di mucha na 2025 lo drenta na vigor. E suspenshon ta bai reverso pa mayornan, pero ta nifiká tambe un reverso pa e gabinete, ku ya pa hopi tempu ta en buska di e posibilidatnan pa ekonomisá. E plan tabata ku Gobièrnu lo a tuma kasi tur e kostonan di akohida riba su kuenta.



Morto i dos herido den kaso di hinkamentu

ETTEN-LEUR — Durante un kaso di hinkamentu djaweps anochi na Etten-Leur, un hende a pèrdè su bida. Polis a haña tambe un mucha seriamente heridá i un muhé heridá den e kas kaminda probablemente e kaso di hinkamentu a tuma lugá. Polis ta konfirmá ku e tres víktimanan ta miembronan di famia.

Banda di 5'or di mardugá, a alarmá e servisionan di yudansa. Momentu ku polis a yega na e sitio, nan

a haña e kurpa sin bida riba kaya. Ambulans a hiba e otro dos víktimanan hospital. Segun Omroep Brabant, tabatin hopi polis riba pia i

tres ambulans a akudí na e sitio. Kiko eksaktamente a sosodé den e kaso, ainda no ta konosí. Ainda no tin detenshon.



Hòmber hinká mata despues di pleitu

ROZENBURG — Un hòmber a muri despues ku djaweps anochi a hink'é den Rozenburg, Zuid-Hol-

land.

Un otro hòmber a hinka e víktima despues di un pleitu na Raadhuisplein.

Djis despues polis a detené e sospechoso. Kiko eksaktamente a sosodé, ainda no ta konosí. Edat di e sospechoso i e víktima tampoko ainda ta konosí.

Despues di e kaso di hinkamentu, polis a trata na reanimá e hòmber. Tambe a pidi asistensia di un helikòpter di trouma. E hòmber a muri na e sitio.

Polis ainda ta investigando. Ta mira imágennan di kámara i tende testigu. Durante reanimashon tabatin hopi hende presente. Nan por tuma kontakto ku ayudo di víktima, polis ta informá.



Helikòpter ta hasi aterisahe di prekoushon

MAASTRICHT -- Un helikòpter Apache di Forsa aéreo djárasen mèrdia a hasi un aterisahe di prekoushon na Maastricht Aachen Airport. E tripulashon a sali seif for di e helikòpter.

Defensa a laga sa ku e servisio tékniko ta na manda pa e aeropuerto di Lim-

burg. Un bosero a bisa segun prosedura, ta trahando riba un indikashon di un posibel desperfekto.

Ta revisá e helikòpter i si tur ta na òrdu, e ta bai bèk su base na Gilze-Rijen. Helikòpter i avionnan militar ku eksepsyon haltu, ta hasi uso di e aeropuerto di Maastricht.



Siña di bo historia, kultura i naturalesa

Bonaire.tv
Historia | Kultura | Naturalesa

TELBO kanal 70 Flamingo TV kanal 23

STATIA/SABA/ST. MAARTEN

Kondekorashon Real pa Catharine Bennett

ORANJESTAD (EUX) – Boluntario pa bida largu, Catharine Elzevar Bennett-Francis, a risibí kondekorashon Real den órden di

Oranje Nassau di Su Mahestat Rei Willem Alexander, pa su trabounan inkansabel di hopi aña pa Statia. El a risibí e honor djáron 26 di

aprel, durante un seremonia spesial na Quill Gardens.

Nasé na St. Kitts and Nevis na aña 1945, komo mucha chikitu Bennett-Francis, konosí komo Miss Kathleen, Kate òf Katey, a bini St. Eustatius. Durante e añanan, e tabata aktivo den misa Metodista, sirbiendo komo lider pa seis dékada. E tabata presidente di Women's League, un organisashon dediká na bi- enestar di hende muhé di e misa.

Bennett den su ròl a fun-

shoná sin reservashon. E tabata tambe miembro di MCCA, un organisashon ku ta mira pa e nesesidatnan di e hende muhé. El fungi komo lider asistente di klas na Bethel pa mas di 40 aña, meskos tambe el a sirbi komo lider asistente na Jeems. Bennett ta parti di Jeems Choir, Jeems United Sisters i a sirbi komo miembro di Auxil-

iary Home Foundation. Pa hopi aña el a kordiná kuminda pa e tim di trabou, un grupo ku a bini e isla pa hasi trabou di misa. E tabata tambe den e komishon pa rekoudá fondo kaminda el a yuda organisá benta di kuminda i bolo. Bennett ketu bai ta aktivo den e komunidad: “Nos mester yuda salbuardiá nos isla, Statia pa e siguiente generashon.”



Weganan di Rei eskolar



Dia 26 di aprel, studiantenan di Sacred Heart School a gosa di e selebrashon di weganan di Rei eskolar, na Johan Cruyff Court. Den nan shirt festivo, e studiantenan a partisipá na weganan di goso i aktividatnan i tabata un manera perfekto pa selebrá Dia di Rei.

Selebrashon Dia Profeshonal Atministrativo



Dia 26 di aprel a selebrá Dia di Profeshonal Atministrativo. Durante e selebrashon, Gobièrnu a rekonosé i apresia e importansia di e kontribushon di su profeshonalnan atministrativo. Gobièrnu a demostrá gratitut na e staf atministrativo di CPS pa nan trabou duru, dedikashon i ekspertisio.

Feria di karera i edukashon pa studiante

THE BOTTOM – “No limitá bo mes. Hopi hende ta limitá nan mes pa loke nan ta pensa ku nan por hasi. Bo por bai te asina leu ku bo mente ta permití. Momentu ku bo kere, bo por logra.” -Mary Kay Ash.

E siman ku a pasa, studiantenan di tantu Sacred Heart School i Saba Comprehensive School, tabatin e plaser pa partisipá na un feria di karera múltiple, dunando e studiantenan e oportunidat pa eksplorá diferente karera i amplia nan konosementu tokante kiko nan ke bira den futuro.

Djaweps 20 di aprel, studiantenan di Sacred Heart School a eksperiensia edukashon pafó di klas, kaminda nan a partisipá den trepan di karera

riba tereno rònt e isla i a bishitá kuater diferente ambiente di trabou, pa eksperiensia i siña tokante un dia típiko den vários sitio di trabou.

Djabièrnè 21 di aprel, studiantenan di tur dos skol tabatin e oportunidat pa eksplorá nan interesnan, siña tokante karanan potensial, siña kon generá eksperensia di trabou i kon pa haña oportunidatnan di edukashon adishonal pa aportá na desaroyo di karera.

Tur esaki tabata posibel dor di vários organisashon den komunidad, momentu ku nan a kompartí perspektivanan teorétiko i personal riba karera dentro di nan organisashon.

E siman a konklui



djabièrnè 21 di aprel, momentu ku henter e skolnan a bini huntu pa e feria anual di karera i edukashon. Diesseis organisashon a

partisipá na e feria, tres ku e biaha di St. Maarten pa forma parti di e evento akí.

E evento tabata un éksito grandi i e ta rekordá nos kon

tipo di eventonan asina por inspirá i empoderá karera pa yuda e studiantenan pa logra nan soño.

STATIA/SABA/ST. MAARTEN

Trùk di paga kandela nobo

THE BOTTOM – Brantwer di Saba a risibí e trùk di mas nobo di paga kandela den su flota dia 26 di aprel. E trùk ta drenta servisio inmediatamente.

E trùk, fabriká pa Wiss, ta signifikante pa aktualisá

e otro trùknan aktualmente den e flota.

Gezaghebber Johnathan Johnson a papia na okashon di entrega di e trùk nobo: “Ta bunita pa e bomberonan ta prepará i bon ekipá. Esaki ta un atkisishon bunita

i mi felisidat boso tur i hasi bon uso di e trùk.”

Brantwer ya ta dunando treinen na e bomberonan kon pa usa di ekipo i komunidat lo mira e trùk nobo riba kaya e simannan ku ta bini. “Mi ta kontentu pa tin

un trùk nobo i ta spera ku lo usa esaki solamente pa treinen,” hefe di Brantwer Every, a bisa.

E proyekto pa un trùk di paga kandela a dura mas òf ménos un aña pa kompletá, ku dos trùk, unu pa St. Eu-

statius i unu pa Saba.

Every a komentá ku el a risibí feedback positivo i entusiasma tokante e trùk nobo i nos mester ta orguyoso. Un danki spesial pa tur ku a yuda ku e proyekto.



DEPORTE

Ayera e finalnan sòftbòl internashonal

KRALENDIJK--Ayera tabatin e finalnan di e torneo internashonal di sòftbòl ku partisipashon di ekiponan femenino i maskulino di Canada, Aruba, Kòrsou i Boneiru.

Tabata un torneo ku a tuma lugá na Jossy Boekhoudt Ballpark na Tera Kòrá ku sigur tabata un

gran éksito ku a laga tras tremendo rekuerdonan di e tremendo partidonan ku a tuma lugá durante e torneo aki.

Ayera o sea djaluna último tabatin e trese finalnan di kua e final damas 10'or mainta.

Despues tabatin pa 12'or mèrdia otro partido final ku

tabata e final 50+.

Pa 2'or di traimèrdia e último final di e torneo ku tabata e final 40+.

Den nos edishonnan ku ta sigui e siman aki nos lo amplia riba e resultado final di e torneo.

Pabien na e ekiponan ku a kai den premiashon na final di e torneo aki.

SAN ATANASIO, Obispu i dòktor di Iglesia

2 di Mei 2023

**“Ami ku Tata ta un!”
(cf Huan 10,30)**

Kon ta posibel ku un ser humano manera nos, ta tripi bisa ku “E ku Dios ta un”? (cf Huan 10,30) Riba dje, E ta referí na Dios, e ser Supremo, Todopoderoso, Kreador di shelu i di tera, ku a libra nos for di Egipto (cf Eks 12,14), komo “Tata”. E pueblo tabata konosé Hesus komo “e Yu di e karpinté i Yu di Maria.” (cf Mateo 13,55) I nan no a aseptá, komo e Mesias.

Pero nos, awe, despues di mas di dos mil aña a lanta konosé i eksperiensia Hesus, komo “e Yu di Dios ku a salba nos, kiermen pordoná nos di nos pikánan” (cf Kol 1,14), pa medio di su pashon i morto riba krus. Felis esnan ku ta kere ...! (cf Huan 20,29)

**Señor hasi nos fe krese!
(cf Lukas 17,5)**

1L Ech 11,19-26; Salmo 87,2-7; Ev. Huan 10,22-30
005999-522-4056 Un Snechil Pan unsnechilpan



Kareda Hot Wheels djasabra último un éksito

KRALENDIJK--Djasabra último na e klup di yudokanan di Rincon, tabatin karedanan di outonan Hot Wheels ku tabata sigur un gran éksito ku a kibra “record” na partisipashon di outonan ku a kompetí den e diferente kategorianan. E premiashon na e ganadornan a tuma lugá na Pomptashon Curoil na Mentor.

Curoil tabata e spònsor prinsipal di esaki. Resultadonan.

Kategoria Paki Será.

1. GB di Gilberto Vrolijk.

2. Braga Power di Danny Engel.

3. Jason Racing di Jason Pop.

Light Stock.

1. Res Bula Team di Ce-

dric “Cheche” Mercera.

2. Hitman Racing di Reymond Melan.

3. Res Bula Team di Cedric “Cheche” Mercera.

Mihó tempu.

Bula Team di Cedric Mercera ku su Ford Mustang “Heat Fleet” ku e tempu di 1.660 sekònde.

Kategoria Stock.

1. Bichota Racing di Mi-

chaelson Martijn

2. Trevor Racing di Judmar Borgschot.

3. Bichota Racing di Michaelson Martijn.

Miho tempu.

Danny Engel di Braga Power ku su Chevrolet Camaro ku 1.643 sekònde.

75gr Outlaw.

1. Res Bula di Cedric “Cheche” Mercera ku su

Ford Mustang”Borla”.

2. Bichota Racing di Michaelson Martijn ku su Ford F-150.

3. Res Bula Team di Cedric “Cheche” Mercera ku su Chevrolet Corvette “Yellow Fever”. Miho tempu.

Danny Engel di “Braga Power” ku su Dodge Charger “EMS” ku e tempu di 1.627 sekònde.

DEPORTE

Bestür nobo di Spesial Olympics Boneiru

KRALENDIJK--Special Olympics Bonaire dja-sabra 22 di aprel, a presentá nan bestür nobo. Despues ku e otro bestür a traha 10 aña, awor a pasa e tarea pa un grupo nobo. Durante e anochi nan a duna rekonesmentu na algun persona, kende a kontribuí pa hopi aña ku nan sosten na Special Olympics Bonaire. Nan a duna apresio di loke e hendenan a kontribuí kuné

durante añanan.

Nòmbernan di e bestür nobo ta: Rolanda Helburg-Makaaí komo presidente, vise presidente Jaira Brito, Thirza Obersi.

Carla Ramkhelawan sekretario, Helma Van Gein segundo sektretario, Leycheron Janga PR, Jessica Martis-Seraus, Merida Meyer-Statia, Wenska Mathilda-Angelica, Kevin Thode i Suraya Hendricks.





KOORYMAN HANDYMAN CHALLENGE

Promé premio

\$3,000

na 'kadohon' i tur hermènt
pa e evento final.

BO TA BAI P'E?

Registrashon ta sera
7 di Mei, 2023

Patrosiná pa
Makita





Payroll Pro

HRM

www.payrollprohrm.com



The most complete payroll
and HR software in the
Caribbean!

Download the mobile app!

GET IT ON Google Play | Download on the App Store

Registrá ku chens pa gana e título di **KOORYMAN'S BEST HANDYMAN** i risibí premionan fabuloso. Bishitá kooymanbv.com pa mas informashon.

Aglomerashon di boto na kosta

Djasabra atardi tabatin basta aglomerashon di boto na kosta di bahia di Kralendijk. No tabata un aktividad anunsiá adelantá. Tabata un aglomerashon estilo di Regata. Riba kosta por a mira personal di Wardakosta tirando bista riba e situashon. No tabatin inkonveniensia.



Popularidat ta relativo
P'esei un propio estilo
No solamente pa ta eksitoso
Sino sigur mas balioso

Brò KèS 93.5 FM

pokopoko pero sigur mas i mas hende ta ...



Skuch'è

Telefon/ WhatsApp +599 701 0935

www.radio935bonaire.com

GRACO
PORTABLE NAPPER

\$229



QUEEN BED W/ DRAWERS

\$395



TWIN BED

\$225



MEMORY FIBER
PILLOW

\$26



City Shop

Smart shopping ▶ Better living



Kaya International #36



www.cityshopbonaire.com



City Shop Bonaire



+599 717.36.66



info@cityshopbonaire.com



cityshopnv